

Tarikh Dibaca: 09 Jun 2017M | 14 Ramadhan 1438H

KHUTBAH JUMAAT

Tajuk:

***“NUZUL AL-QURAN: MENGHAYATI
TUJUAN AL-QURAN DITURUNKAN”***

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR



SENARAI AHLI JAWATANKUASA KHUTBAH NEGERI SELANGOR 2017

- 1. SS. Dato' Haji Haris Bin Kasim (Pengerusi)**
Pengarah Jabatan Agama Islam Selangor
- 2. SS. Dr. Haji Anhar Bin Haji Opir (Ahli)**
Timbalan Mufti, Jabatan Mufti Negeri Selangor
- 3. Tuan Haji Idris Bin Ramli (Setiausaha)**
Ketua Penolong Pengarah, Bahagian Pengurusan Masjid, JAIS
- 4. Yg. Berbahagia Dr. Haji Osman Bin Haji Sabran (Ahli)**
Pensyarah, Universiti Selangor
- 5. Dato' Haji Abdul Majid Bin Omar (Ahli)**
Ahli Jawatankuasa Fatwa Negeri Selangor
- 6. Tuan Haji Hamid Bin Md Isa (Ahli)**
Pensyarah, Kolej Universiti Islam Selangor
- 7. Tuan Haji Md. Sahari Bin Abdullah (Ahli)**
Ahli Jawatankuasa Fatwa Negeri Selangor
- 8. Tuan Haji Abdul Halem Hapiz Bin Salihin (Ahli)**
Ketua Penolong Mufti (Fatwa), Jabatan Mufti Negeri Selangor
- 9. Ustaz Muhammad Farhan Bin Wijaya (Ahli)**
Imam Besar Masjid Sultan Salahuddin Abdul Aziz Shah
- 10. Ustaz Indera Shahril Bin Mohd Shahid (Ahli)**
Pegawai Majlis Agama Islam Selangor
- 11. Ustaz Hairol Azmi Bin Khairudin (Urusetia)**
Penolong Pengarah Unit Khutbah, BPM, JAIS



“NUZUL AL-QURAN: MENGHAYATI TUJUAN AL-QURAN DITURUNKAN”

الْحَمْدُ لِلَّهِ الْقَائِلِ: الْحَمْدُ لِلَّهِ الَّذِي أَنْزَلَ عَلَى عَبْدِهِ
الْكِتَابَ وَلَمْ يَجْعَلْ لَهُ دُعُوجًا¹
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ
أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى
سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أُوصِيكُمْ
وَأِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى:
يَا أَيُّهَا الَّذِينَ آمَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ
إِلَّا وَأَنْتُمْ مُسْلِمُونَ.

Muslimin yang dirahmati Allah sekalian,

Saya berpesan buat diri saya dan tuan-tuan sekalian, marilah kita bertaqwa kepada Allah SWT, dengan melaksanakan segala perintah dan menjauhi segala larangan-Nya. Sesungguhnya perintah dan larangan Allah itu dapat difahami dengan mempelajari dan menghayati kitab yang telah diturunkannya iaitu al-Quran. Ia telah mula diturunkan dalam bulan Ramadhan sejak 1,400 tahun yang lalu.

¹ Al-Kahfi : 1



Khutbah hari ini bertajuk *"NUZUL AL-QURAN: MENGHAYATI TUJUAN AL-QURAN DITURUNKAN"*.

Hadirin sidang Jumaat sekalian,

Al-Quran adalah kata-kata Allah yang menakjubkan, yang diturunkan kepada Nabi Muhammad SAW, yang tertulis pada mushaf-mushaf, yang disampaikan dengan periwayatan yang sempurna dan menjadi ibadah apabila membacanya. Demikianlah para ulama memberikan pengertian al-Quran agar kita mengenalinya, membaca dan berusaha untuk memahaminya.

Sempena meraikan tarikh Nuzul al-Quran, marilah kita mengulangkaji kefahaman kita terhadap peristiwa besar ini. Nuzul Al-Quran dalam bulan Ramadan mengandungi maksud utama, iaitu:

1. Turunnya secara keseluruhan dari Lauh Mahfuz ke Baitul Izzah di langit dunia pada malam al-Qadar dalam bulan Ramadan.
2. Al-Quran adalah wahyu Allah buat kali pertamanya diturunkan kepada Rasulullah SAW pada malam ke 17 dalam bulan Ramadan, 13 tahun sebelum hijrah baginda SAW ke Madinah.

Para hadirin tetamu Allah sekalian,

Al-Quran adalah kurnia Allah yang mulia dan diturunkan pula dalam bulan Ramadan yang mulia ini. Memperingati peristiwa Nuzul al-Quran bukanlah sekadar mengetahui sejarah dan tarikh penurunannya. Bahkan, apa yang lebih penting adalah menginsafi matlamat ia diturunkan dan melaksanakannya. Sesungguhnya, tujuan al-Quran diturunkan telah dijelaskan dalam al-Quran, iaitu:

1. Supaya ia diterangkan kepada manusia. Firman Allah dalam surah al-Nahl, ayat 44:



وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ إِلَيْهِمْ
وَلَعَلَّهُمْ يَتَفَكَّرُونَ ﴿٤٤﴾

"Dan Kami turunkan kepadamu (Wahai Muhammad) al-Quran yang memberi peringatan, supaya engkau menerangkan kepada umat manusia akan apa yang telah diturunkan kepada mereka, dan supaya mereka memikirkannya".

2. Supaya ia dijadikan hukum pemutus antara manusia. Firman-Nya lagi dalam surah al-Nisa', ayat 105:

إِنَّا أَنْزَلْنَا إِلَيْكَ الْكِتَابَ بِالْحَقِّ لِتَحْكُمَ بَيْنَ النَّاسِ
بِمَا أَرَاكَ اللَّهُ وَلَا تَكُنْ لِلْخَائِنِينَ خَصِيمًا ﴿١٠٥﴾

"Sesungguhnya Kami menurunkan kepadamu (Wahai Muhammad) Kitab (al-Quran) dengan membawa kebenaran, supaya engkau menghukum di antara manusia menurut apa yang Allah telah tunjukkan kepadamu (melalui wahyu-Nya); dan janganlah engkau menjadi pembela bagi orang-orang yang khianat".

Hadirin Jumaat sekalian,

Bagi menegaskan kebenaran bahawa al-Quran itu turun daripada Allah SWT dan benarnya ia sebagai panduan untuk kehidupan manusia seluruhnya, maka Allah telah menjadikan ia mengandungi mukjizat yang boleh memberikan kefahaman kepada manusia dengan mudah. Firman Allah SWT dalam surah Fussilat ayat 53:



سَنُرِيهِمْ ءَايَاتِنَا فِي الْأَفَاقِ وَفِي أَنْفُسِهِمْ حَتَّىٰ يَتَبَيَّنَ
لَهُمْ أَنَّهُ الْحَقُّ ۖ أَوَلَمْ يَكْفِ بِرَبِّكَ أَنَّهُ عَلَىٰ كُلِّ شَيْءٍ
شَهِيدٌ

"Kami akan perlihatkan kepada mereka tanda-tanda kekuasaan Kami di merata-rata tempat (dalam alam yang terbentang luas ini) dan pada diri mereka sendiri, sehingga ternyata jelas kepada mereka bahawa al-Quran adalah benar. Belumkah ternyata kepada mereka kebenaran itu dan belumkah cukup (bagi mereka) bahawa Tuhanmu mengetahui dan menyaksikan tiap-tiap sesuatu?"

Para muslimin yang dikasihi Allah sekali,

Kerana itulah, saban waktu kita mendengar tentang pelbagai penemuan baru dalam bidang sains, sejarah mahupun ilmu-ilmu yang lain. Penemuan saintifik yang menunjukkan benarnya al-Quran, seperti hakikat matahari beredar pada orbitnya sendiri dijelaskan dalam surah Yasin ayat 38, tempat pertempuran Rom dan Parsi adalah tempat yang paling rendah sekali di dunia sebagaimana dijelaskan dalam surah ar-Rum ayat 3, cap jari manusia tidak ada yang sama, ilmu-ilmu forensik dan DNA disebut juga dalam surah Qiamah ayat 4, batu-batu binaan piramid berasal dari tanah liat yang dibakar dijelaskan dalam surah al-Qasas ayat 38 dan lain-lain. Kesemuanya baru ditemui oleh saintis pada zaman moden ini, tetapi telah diberitahu oleh Al-Quran sejak lebih 1400 tahun yang lalu.

Hadis daripada Abu Umamah al-bahili R.Anhu bahawa Rasulullah SAW bersabda:



اقْرَأُوا الْقُرْآنَ فَإِنَّهُ يَأْتِي يَوْمَ الْقِيَامَةِ شَفِيعًا لِأَصْحَابِهِ

"Bacalah Al-Quran, kerana ia akan datang memberi syafa'at kepada para pembacanya pada hari kiamat nanti".

(Riwayat Muslim).

Hadirin yang dikasihi Allah sekalian,

Saksikanlah, bagaimana Ummu Aiman pengasuh Nabi SAW sewaktu baginda kecil, merasai kesedihan atas terhentinya wahyu. Abu Bakar as-Siddiq dan Umar al-Khattab telah menziarahi Ummu Aiman selepas kewafatan Rasulullah SAW kerana meneruskan kebiasaan baginda menziarahi bekas pengasuhnya itu. Dan ketika mereka sampai di tempatnya, Ummu Aiman pun menangis. Lalu mereka berdua berkata kepadanya:

"Kenapa kau menangisi baginda? Bukankah apa yang ada di sisi Allah itu lebih baik bagi Rasul-Nya? Ummu Aiman menjawab: Bukanlah aku menangis kerana aku tak tahu bahwa apa yang ada di sisi Allah itu lebih baik bagi Rasul-Nya. Tetapi aku menangis kerana dengan wafatnya baginda, bererti wahyu dari langit telah terputus. Ummu Aiman pun membuat mereka berdua bersedih dan akhirnya mereka berdua pun menangis bersamanya.

(Riwayat Muslim).

Sidang Jumaat sekalian,

Lihatlah, bagaimana para sahabat menghargai wahyu yang diturunkan oleh Allah SWT. Lihatlah bagaimana mereka merindui zaman penurunan wahyu dari langit. Mereka merasai indahnya hidup ketika langit



dan bumi masih berhubung dengan turunnya malaikat Jibril membawa wahyu kepada manusia melalui baginda Rasulullah SAW.

Apa yang tinggal pada kita adalah kitab yang mengandungi wahyu tersebut. Kitab yang mencatatkan segala bicara Allah SWT kepada kita. Marilah kita memuliakan kitab ini dengan membacanya setiap hari. Marilah kita hargai kitab ini dengan berusaha memahami isi kandungannya, yang ditujukan kepada kita sendiri, sebagai manusia. Marilah kita tatap dan hargai risalah Allah ini lebih daripada kita menghargai surat kekasih atau anak kesayangan kita. Marilah kita fahami risalah Tuhan ini, lebih dari usaha kita memahami surat yang kita terima dari pemerintah atau mahkamah yang memberi amaran kepada kita.

Sesungguhnya, kitab inilah satu-satunya panduan utama bagi manusia yang kekal terpelihara. Allah tidak menjadikan sebarang jaminan kepada kitab Taurat dan Injil, lalu ia diubahsuai oleh manusia. Tetapi Allah telah menjamin al-Quran ini terpelihara hingga hari kiamat. Bukan hanya untuk disimpan sebagai perhiasan dinding atau dalam almari. Bukan hanya sebagai selingan ketika sunyi atau menghadapi gangguan makhluk halus. Sebaliknya, al-Quran adalah panduan harian kita, yang membimbing kita dalam menghadapi masalah dan cabaran kehidupan kita. Bahkan sebagai panduan hidup bermasyarakat dan bernegara. Barulah kita benar-benar menghargai al-Quran dan memahami tujuan ia diturunkan oleh Allah SWT.

Hadirin sidang Jumaat sekalian,

Marilah kita mengajak keluarga kita, saudara mara kita, jiran-jiran kita, sahabat-sahabat kita dan seluruh kenalan kita untuk sentiasa mendampingi al-Quran. Peruntukkanlah masa setiap hari untuk membacanya, memahami makna dan sentiasa mengambil iktibar dengan melaksanakan tuntutan-tuntutannya dalam kehidupan seharian kita.



Marilah kita bermuhasabah dengan melihat dalam diri kita masing-masing secara ikhlas dan penuh keinsafan, berapakah masa kita peruntukan untuk belajar, membaca dan mendalami al-Quran setiap hari, setiap bulan atau setiap tahun. Mampukah kita untuk menjawab pertanyaan Allah SWT tentang dimanakah duduk letaknya al-Quran dalam kehidupan kita ketika ini berbanding perkara atau urusan-urusan lain yang menjadi keutamaan.

Ingatlah firman Allah SWT dalam surah al-Furqan, ayat 30 dan 31 yang menggambarkan keluhan Rasulullah SAW tentang sikap manusia terhadap kitab yang agung ini.

وَقَالَ الرَّسُولُ يَرْبِّ إِنَّ قَوْمِي اتَّخَذُوا هَذَا الْقُرْآنَ
مَهْجُورًا ﴿٣٠﴾ وَكَذَلِكَ جَعَلْنَا لِكُلِّ نَبِيٍّ عَدُوًّا مِّنَ
الْمُجْرِمِينَ ﴿٣١﴾ وَكَفَىٰ بِرَبِّكَ هَادِيًّا وَنَصِيرًا ﴿٣٢﴾

"Dan berkatalah Rasul: "Wahai Tuhanku Sesungguhnya kaumku telah menjadikan al-Quran ini satu perlembagaan yang ditinggalkan, tidak dipakai. Dan demikianlah Kami jadikan bagi tiap-tiap Nabi, musuh dari kalangan orang-orang yang bersalah; dan cukuplah Tuhanmu (Wahai Muhammad) menjadi pemimpin (ke jalan mengalahkan mereka) serta menjadi penolong (bagimu terhadap mereka).

Semoga kita tidak tergolong di kalangan manusia yang disebut dalam ayat tadi. *Na'uzu billah min zalik.*

Sehubungan dengan itu, bagi mendidik dan mentarbiah diri kita, keluarga dan seluruh individu yang mengaku Islam dan beriman terhadap



al-Quran, marilah kita bersama-sama menjayakan hasrat kepimpinan kerajaan Negeri Selangor untuk membudayakan kehidupan masyarakat Muslim yang sentiasa berinteraksi dengan al-Quran melalui program "GEMA IQRA'" Selangor yang akan dilaksanakan pada 12 Jun 2017 (Isnin) bersamaan 17 Ramadhan 1438H. Program tersebut akan dilaksanakan di seluruh masjid dan surau di Negeri selangor mulai jam 9.00 pagi yang memberi ruang untuk kita beriktikaf, solat sunat Dhuha, bertadarus dan mengambil iktibar dari slot tadabbur al-Quran yang akan disampaikan oleh para pembimbing. Mudah-mudahan program Gema Iqra' Selangor yang dilaksanakan mampu menjadi salah satu aktiviti penting di Bulan Ramadhan sebagai madrasah takwa bagi seluruh umat Islam khususnya di Negeri Selangor.

أَعُوذُ بِاللَّهِ مِنَ الشَّيْطَانِ الرَّجِيمِ

أَقْرَأْ بِاسْمِ رَبِّكَ الَّذِي خَلَقَ ﴿١﴾ خَلَقَ الْإِنْسَانَ مِنْ عَلَقٍ ﴿٢﴾
أَقْرَأْ وَرَبُّكَ الْأَكْرَمُ ﴿٣﴾ الَّذِي عَلَّمَ بِالْقَلَمِ ﴿٤﴾ عَلَّمَ
الْإِنْسَانَ مَا لَمْ يَعْلَمْ ﴿٥﴾

"Bacalah (wahai Muhammad) dengan nama Tuhanmu yang menciptakan (sekalian makhluk), Ia menciptakan manusia dari sebuku darah beku; Bacalah, dan Tuhanmu yang Maha Pemurah, yang mengajar manusia melalui pena dan tulisan, Ia mengajarkan manusia apa yang tidak diketahuinya".

(al-Alaq; 1-5).



بَارَكَ اللَّهُ لِي وَلَكُمْ فِي الْقُرْآنِ الْعَظِيمِ،
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ
هُوَ الْغَفُورُ الرَّحِيمُ.

Abu/Nurul
07.06.2017



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ
الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ،
أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam. Oleh itu marilah kita sentiasa memperbanyakkan solawat dan salam ke atas Nabi kita Muhammad SAW. Firman Allah SWT:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا
صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِنَا وَمَوْلَانَا مُحَمَّدٍ سَيِّدِ
الرُّسُلَيْنِ وَارْضَ اللّٰهُمَّ عَنْ اَصْحَابِهِ وَقَرَابَتِهِ
وَاَزْوَاجِهِ وَذُرِّيَّاتِهِ اَجْمَعِينَ.

اَللّٰهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ الْاَحْيَاءِ مِنْهُمْ وَالْاَمْوَاتِ، اِنَّكَ سَمِيعٌ
قَرِيبٌ مُّجِيبُ الدَّعَوَاتِ يَا قَاضِيَ الْحَاجَاتِ. اَللّٰهُمَّ
اِنَّا نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِينِ، وَنَسْأَلُكَ
بِاسْمَائِكَ الْحُسْنٰى وَصِفَاتِكَ الْعُظْمٰى اَنْ تَحْفَظَ
بِعَيْنِ عِنَايَتِكَ الرَّبَّانِيَّةِ وَبِحِفْظِ وَقَايَتِكَ
الصِّمْدَانِيَّةِ، جَلَالَةَ مَلِكِنَا الْمُعْظَمِ سُلْطَانَ
سَلَاطُور، سُلْطَانَ شَرْفِ الدِّينِ اَدْرِيسِ شَاهِ الْحَاجِ
ابْنِ الْمَرْحُومِ سُلْطَانَ صَلَاحُ الدِّينِ عَبْدِ الْعَزِيزِ
شَاهِ الْحَاجِ. اَللّٰهُمَّ اَدِمِ الْعَوْنَ وَالْهِدَايَةَ وَالتَّوْفِيقَ،
وَالصِّحَّةَ وَالسَّلَامَةَ مِنْكَ، لَوْلِيَّ عَهْدِ سَلَاطُور،
تَغْكُو اَمِيرِ شَاهِ ابْنِ السُّلْطَانَ شَرْفِ الدِّينِ اَدْرِيسِ
شَاهِ الْحَاجِ فِي اَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ



يَا ذَا الْجَلَالِ وَالْإِكْرَامِ. اَللّٰهُمَّ اَطْلُ عُمْرَهُمَا
مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ، وَبَلِّغْ
مَقاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah, terimalah amalan soleh kami, suburkanlah jiwa kami dengan budi pekerti yang mulia, satukanlah hati-hati kami, kurniakanlah kami rezeki yang luas lagi barakah, kayakanlah kami dengan ilmu yang bermanfaat, lindungilah kami daripada bala bencana dan peliharalah kami daripada ajaran sesat seperti Syiah, Qadyani, dan lain-lain ajaran yang difatwakan menyeleweng dari ajaran Islam atau bertentangan dengan pegangan Ahli Sunnah Wal Jamaah. Ya Allah bujukanlah hati kami untuk mendirikan solat fardhu lima waktu, menunaikan zakat melalui Lembaga Zakat Selangor, mewakaf dan menginfaqkan harta melalui Perbadanan Wakaf Selangor dan Tabung Amanah Pembangunan Islam Selangor.



رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُوا لَهُ عَلَىٰ
نِعْمِهِ يَزِدْكُمْ، وَاسْأَلُوهُ مِنْ فَضْلِهِ ۖ يُعْطِيكُمْ
وَلَذِكُرِ اللَّهَ أَكْبَرُ ۚ وَاللَّهُ يَعْلَمُ مَا تَصْنَعُونَ.
